

復丁雨帥五

奉本月初九日手教，誨注交摯，感何可言！「發餉時船多，至用船時船少」，誠哉是言！許以登瀛洲見詒，不啻百朋之錫，但願完固，不敢刻期。漁戶搶船，固是積習，而根原由於破案時，地方官勒富戶償之，故肆無忌憚，執成分段。責成禁之於未雨之先，官民均受其益矣。

王副將聞已蒙委缺，士逢知己，如鴻毛之遇順風，正當使各盡其用，不必更令回滬。唐景星過金陵，來見兩次，是本兼顧招商局者，遇在滬時有事，儘可奉托也。海州旱蝗相繼，幅匪萌動。海巖刺史正在捕蝗緝盜，勤瘁則有之，人固無恙，請釋蓋廬。

臺之精華在北。南路有觀察在，北路必獨當一面，似臺北府之任重於臺灣府。敢以質高明。

九龍山事決其偽而不發行，極佩定識定力。皖中割辦案，層見疊出，犯者多湖北人，而建平遂有客民戕殺教民燬堂之事。

出洋必不可緩，其費自當於海防中籌之，合肥想不見拒。丹崖百日滿仍可照常任事，故日監督來金陵，弟仍催其赴津，亦知尊意急欲成此舉也。伯相奉命赴煙臺。聞威使於十六日自滬北行，未知果否？伯相有「全權」字樣，愈好看愈爲難矣。

敬叩台安，教謙謹璧。